

Mayrene Helmeyer

Reina di Carnaval 40

Despues di lagere school, Mayrene a continua su estudio na Colegio Arubano y cu su 17 aña el a gradua pa VWO na 1994. Actualmente e ta studiando na Eindhoven, Hulanda pa M.B.R.T. (Medische Beeldvormige en Radiotherapeutische Technieken). Segun Mayrene tur cos ta bayendo hopi bon mes cu su estudio. Mayrene a contanos su experiencia durante y despues di Carnaval: "E momento mas emocionante pa mi tabata ora cu mi a ser elegi como reina di Carnaval 40. Tambe durante di parada grandi na San Nicolas y Oranjestad, na unda mi a sinti cu e pueblo carnavalesco a acepta mi como nan reina pa medio di e aplauso y comentarionan hopi positivo cu mi a recibi". Segun Mayrene cada hoben cu ser elegi y corona como un reina mester experiencia algo nobo, na cierto momento bo ta haña bo mas serca di publico, y door di esey bo ta sinti con agradabel ser un persona publico por ta.

Mayrene ta haña cu tur esakinan ta momentonan masha ameno cu semper elo sigi corda riba dje. Tambe e ta masha orgulloso mes di por a representa su skol Colegio Arubano. Mayrene a ser aserca pa ser modelo y tambe pa organisacion di Miss Aruba, pero pa motibo di su estudio e no tin tempo pa dedica na e sorto di actividadnan aki. Mayrene kier a tuma e oportunidad aki, pa un biaha mas gradeci tur su sponsernan y tur otronan cu di un manera of otro a contribui na su preparacion y presentacion, un

biaha mas hopi danki. Terminando Mayrene kier a manda un mensahe hopi positivo pa nos hubentud Arubano: Amigo y amiganan, "Ki dushi ta ser hoben. Un etapa den bida cu por ta hopi di nos grandinan sigur lo kier ripiti, si esey por tabata posibel. Nos pues cu ta hobenan awe, ban disfruta na un manera decente y responsabel di nos hubentud.

Ku respet pa nos mes y pa otro, sin haci nos mes of otro daño. Lo bo no kier ta un bon ehempel pa bo mesun ruman, amigo of amiga?. Nos ta ser enfrenta cu hopi cosnan negativo den nos hubentud, e.o. uso di droga, alcohol y delincuencia.

Ban aleha nos di esakinan y trata di kita otro for di un mal idea of bicio. Droga ni alcohol ta aporta positivamente na nos desaroyo mental o fisico, alcontrario. Amigo, amiganan nos no por muestra nos mayornan, nos maestronan mas respet y

trata na comunica mas cu nan?. Ohala nos tur por sigi nan bon consehonan. Reflecciona, sea bo mes cu bista firme ariba un presente y futuro sano y felis. Cu boso tur por disfruta consiente di bo comportacion di un dushi Carnaval 1995". Mayrene ta spera cu poder di Dios, si e por regla cu su skol e lo bin pa baha su corona.

